

Tico Croes ta puntra Gobierno:

CON POR PONE 250 MIYON PA LAGO BANDA DI 23.800 DWANGSCHRIFT PA PUEBLO

Enbez di mehoranza social Pueblo a haya cobranza di belasting

ORANJESTAD (AAN):

"Segun tur rapport cu exper-tonan a emiti despues di 1988 Aruba mester a biba cu prosperidad. Gabinete Eman a kibra desempleo y a pone base pa Pueblo por a bay dilanti. Sinembargo Gobierno Oduber a hiba un maneho descabeya y placa di Pueblo a worde malgasta. Pa Gobierno por a soluciona e excesonan di gasto cu e tin el a basha cobranza di belasting atraza ariba Pueblo mientras Lago/Exxon por a bay cu Miyones y Miyones." Na palabra Tico Croes.

E miembro di Parlamento pa AVP a mostra ariba e maneho cu Gobierno a hiba pa haya placa mientras Gobierno no a maneha placa di Pueblo na forma responsable.

Tico Croes a mostra cu aña pasa Gobierno a reparti 23.800 dwangschrift den Pueblo cu a worde obliga di paga belasting atraza cu hopi no tabata sa mes cu nan tabata debe. Tico Croes a mostra ariba e casi cien casonan den cual beslag a worde poni ariba propiedad di ciudadanonan.

Mientras mal gobernacion a pone Pueblo ta selama hac e peso di problemanan social Gobierno ta sigui kibra e poder di compra di ciudadanonan cu cobranza di belasting.

"Enbez cu nos Arubianonan tin mas placa den saco pa por haci compranan di acuerdo cu nan preferencia Gobierno ta impone un situacion inhusto y intolerable pa e Pueblo" Tico Croes a bisa. El a mostra cu ta un aspecto importante di democracia pa Pueblo por haci compras di acuerdo cu su preferencia. Pero awor aki e peso di costo di bida ta crea condicionnan social dificil mientras Gobierno a dicidi di haci bida mas dificil pa ciudadanonan cu e cobranza di belasting atraza.

Mientrastanto Pueblo mester tuma nota con Gobierno a laga Lago/Exxon bay cu 250 Miyon Dollar na reclamo ambiental y 273 Miyon Florin por lo menos na placa di belasting cu ainda

Lago/Exxon tabata debe.

Tico Croes a bisa: "Bo ta mira un Gobierno cu a priminti un futuro briyante cu lo mester a significa un mihor calidad di bida y mas oportunidad. Kico nos ta mira? Gobierno ta competi inhustamente cu sector priva yenando aparato gubernamental cu amigonan politico aumentando e gastonan pa Pueblo sin necesidad. Gobierno a permiti mal uso di trahador extranhero loke a afecta e posicion di e trahador Arubiano. E competencia inhusto ariba tereno di sueldonan. Costo di bida a haci cu un Florin ta bal realmente 80 cent y ariba esaki Gobierno a basha e medida di cobranza di belasting atraza ariba Pueblo."

E miembro di AVP a mostra cu awor cu Pueblo ta selama na Gobierno pa cum-

pli cu su promesa di eleccion pa duna Pueblo un futuro briyante Gobierno ta caba cu Pueblo cu cobranza di belasting atraza.

"Den Staten nos tabata testigo con partidonan cu ta sostene Gobierno a bay di acuerdo pa no laga Lago/Exxon paga e 250 Miyon Dollar cu e tabata debe pa dañonan ambiental. Den Staten nos tabata testigo con a dicidi di no cobra Lago belasting atraza. Pero pa Pueblo si Gobierno no conoce ni pordon ni piedad' Tico Croes a trece dilanti.

El a finaliza bisando cu ta un abuso cu e mes Gobierno cu a pone tanto hende bebe den angustia pa motibo di belasting atraza a regala Miyones di placa di Pueblo na un compania multinacional manera Lago/Exxon.